

Allerkülz!

Eisch sinn de Joachim Bender unn verziehle ouch ebbes von Allerkülz, dem Doref wo isch mit meiner Familie schon so lebb Daach wohne.

Mit ebbes iewer 400 Ennwohner, lewe wenischer Leit, inn viel meh Häiser, wie datt noch inn meiner Kindhääät de Fall war.

Watt äänem, wo nooh Allerkülz will, ufffällt, iss, datt mer et Doref erscht sieht, wemmer kurz devor iss.

Et leiht ganz im Daal, unn schlängelt sich uff ääner Seit langst die Bach. An de Kreuzstrooß gehr et niewer uff die lewewerbach.

Früher, wem-mer uff em Wahn gehuckt hot unn mit nous inn de Fluer gefahr iss, kam et ähm so vor, ass däät et Daal die Häiser verschlucke. De goldisch Gockel von de evangelisch Kerisch, hot mer alt noch als äänzisches gesiehn.

Fährt mer dorisch et Doref, stellt mer fest: „Ou, Allerkülz iss awer lang!“ Joo, uus Doref iss ball 1700 Meter lang unn inn Strooßedoref.

Woher de Name kömmt, wääß mer nitt so genau. Jedenfalls horr et im Mittelalter einische Külz, ore „kultze“ Siedlung langst de Külzbach genn.

Vielleischt iss „Alterkülz“, (von Alter) die ältst Siedlung.

Ore „Allerkülz“, iss datt Külz, wo nooh ner Pestepidemie, lewerlewende von annere Külzsiedlung, wo wüst woor sinn, sich aangesiedelt honn, dann wär et datt Külz (Alter), also Allerkülz, wie mer inn de Mundart sahn.

Schon früh war de Roum Allerkülz besiedelt. Inn de Grundhääät, unner de Strooß von Allerkülz noh Nouerkerisch, hot mer beim Strooßebou 1875, die Fundamente von ner Römervilla freigelaacht.

Inn de Beerkestruth sieht mer hout noch die Hügelgriewer ous de Keltische Zeit.

De Fluername Silwerschmelz, weist uff de Berischbou im 18.- unn 19. Johrhunnert hien.

Ous Unner,- Mittel,- Oherdoref,- lewewerbach unn Wehr, iss Allerkülz, wie et hout aussieht, zesamme gewachs. Die Lücke zwische de äänzelne Ortsdääl, sinn erscht inn de letzte 10-15 Jahr zugebout woor.

Von de Hauptstrooß ous, kömmt mer direkt inn die alte Noubougebiete, „Im Merjewiesje“ unn uff de „Faller“.

Inn et aktuell Noubougebiet kömmt mer iewer die Wehrer Träab.

Inn de Newestrooße stehn weinisch Häiser.

Süd- Westlich vom Doref, wo frieher die Eisenbahn langst gefahr iss, doo iss aweile de Raadwesch. Dä iss bekannt woor, in ganz Deitschland, dorisch de Schinnerhannes Marathon.

Kömmst de ous Rischung Siemere am Doref rinn, iss dann reeschts die evangelisch Keerisch, wo 1759 nou gebout wor iss, links et Parrhous iss verkaaft. Inn de Parrschouer iss et evangelisch Gemäänehous.

Weirer, dorisch et Unnerdooref, kömmt mer an de Wirtschaft vorbei, aan et Roothes. Mit de Bushaltestell vooredraan, sim-mer am Mittelpunkt vom Doref. Doo spielt sich alles ab, doo komme die Leit hien, wenn inn Allerkülz watt ze tuun iss.

Unn die Leit komme von iewerall her, for inn ehrem Verein, ore Club, datt, mache ze kenne, watt se geere mache.

Genauso fahre re aach inn annere Deerfer, ore Städt, wo sich Gleichgesinnte inn ehrem Intressensgebiet ze samme finne.

Unn datt iss ebbes guures, darr et hout inn Netz von alle miehliche Gruppe unn Vereine gitt, wo mer sich iewerregional treffe kann.

Voor em Rotheres, uff de Bännk, hocke die Alte, kriehe die Nouischkääte, wo die Leit mitbrenge, ous erschter Hand mit.

Uus Rotheres iss inn de Woch, jede Daach belaacht, im Winter aach noch Samsdaas. Komme noch Beerdischunge unn Huckserte debei, wird et schon schwierisch. Unne drunner, inn de ehemalisch Gefrieranlage, honn die juchendliche ehr Unner. Die iewe dann Naachts alt mit ehrer Stimm, wie laut se schon krääsche könne. Große Feste were hinner em Rotheres gefeiert.

Vom alte Unnerdooref nuffer bis iewer et Mitteldooref, stehn die meerschte alte Häiser unn Schouere.

Uff die lewerbach, gehr et ann die Kreustroß, gehniewer vom Höhwesch, Rischung Laabach. Vonn de Alte iewerliewert iss, datt aan dem Flössje, watt aweile verrohrt iss, sich die erschte Siedler nieregeloss härre.

Die Dorefstroß weirer nuff, kömmt mer an de Kinnergaarte, mirr em Naturnahe Spielplatz debei. Datt war et alt Schoolhous, wo eisch noch ninn inn die Schoolgang sinn.

Voore draan uff em Denkmool, stehn die 32 druff, wo ous de zwei Weltkriesche nim-me hämm kame.

Newedraan die Raiffeisekass, mit dem alte Reiffeiselaacher.

Unnedraan de Bolzplatz for die Kinner. Datt iss ääner von de 400, wo de DFB, inn ganz Deutschland gebout hot, um ebbes for de Fußballnohwuchs ze tuun. Bei der Ennweihung hot de Andy Brehme, zum wievielte Mol verziehle mieße, wie er 1990 de Elefmeter ninngeschoss hat, unn Deutschland Weltmääster wor iss. Ween siehst de aweile alt druff spiele? Die Alte Herre!

Weirer nuffer im Doref, uff em Wehr, stehn meh noue Haiser. Die Leit harre schon frieher ehr klää Landwirtschaft uffgenn unn sinn schaffe gang.

Et Kapellsche, 1920 gebout, iss de katholische ehr Keerisch, unn steht links.

Vor dem alte Bahnhoop, leiht rechts et Gelände vonn de Firma Petry Stahlbou. En Stück weier gehr et Doref noch, bis aan et alt Säewerick, wo awei de Bildhauer Braun drin hermeneert. Doo iss drumm errumm alles bissje verwildert.

Mer honn aach ebbes im Doref, watt nitt jeder hot, mer honn Blumebeete aan de Strooß. Se ware gedaacht, for ze beruhische, also de Verkehr!

De Verkehr hot sich aach beruhischt, et wird langsamer gefahr.

Awei sinn die Leit nitt beruhischt. Die Ääne siehn et Unkrout wachse, annere määne, die Roose mießte geschriet were. Wiere annere frohe sich, ob mer die Beete, wo so en Arwitt mache, iewerhaupt gebroucht härre?

Die werkliche Probleme sinn annere. Die alte Bouergehöfte, wo ennt noo em annere zum leer stehn kömmt, die ware for die Landwirtschaft gut enngeriescht. Se stehn aan de Strooß, honn Schouer unn Schopp hinnedrahn, unn die grooß Bitz.

For jemand, wo schaffe geht, ore seine wohlverdiente Ruhestand verbrenge will, geer noch en klää bissje Grün hot, iss so en Bouerehuup zu groß unn mischt zuviel Arwitt.

Meer sinn aach inn Allerkülz mit dem Umbruch, von äänem Boueredooref, inn en gemischt Wohndooref schon weit. Wenn et gelingt, for datt ään ore anner Gehöft wo leer weerd, jemand ze finne, wo et erhalte kann unn jemand wo annere alte Gebäude abreise will, for Wohnraum ze schaffe, dann hot Allerkülz inn Zukunneft.

Vonn dem Lewe, wie et inn uusem Doref, inn meiner Kindhää war, eisch sinn awei 56, hom-mer uus längst verabschiedt. Die Schoore von Kinner, wo dorisch die Derfer gestroomert sinn, ei die girr et nitt meh.

Dorisch Zuzuuch von einische junge Leit, hom-mer in Allerkülz noch en Anzahl Kinner. Unn doch sinn die nore 1,3 ore 1,4 Kinner pro Ehepaar im Dorichschnitt, inn ganz Deutschland, uus allergrößt Problem.

Moondaach, Dinnsdaach, Mittwoch, Donnerschdaach unn Freidaach, wenn die Kinner merr em Buss in die School, die Leit schaffe sinn unn wenn Nommedaas noch „Sturm der Liebe“ kömmt, määnst de Allerkülz wär ousgestoreb.

Am Samsdaach ore aach nooh Feierowend, jähe die paar Bouere, wo ehr Landwirtschaft noch newebeie mache, mit ehre Bulldoggs unn Maschine, so groß, datt die Alte frieher defor gekrouelt härre, kreuz unn quer dorisch et Dooref.

Am Soondaach, wenn die Leit wo schaffe gehn Frei honn, sieht mer e alt, wo schon länger verheirat sinn, en Runde um et Dooref spazeere.

Geht mer mol iewer die Kuhnegass nuff uff die Hambuch unn setzt sich uff die Bank, dann könnt mer määne, mer wär im Allgäu.

Halleb Allerkülz, Michelbach, Hunndem, biss uff de Blümling kam-mer gucke.

In de anner Rischtung sieht mer Siemere, unn hinnedrahn, de Soonwald, mitunner aach de Iere.

Wenn die Sischt ganz gut iss, dann kömmt et ehm vor, de Soon däät direkt hinner Siemere schon aanfänge.

De alt Spruch, von früher, iewer die Allerkülzer, hört mer kaum noch:
„Die Allerkülzer Kappesbouere, sitze uff de Mouere unn fänge sisch die Flöh!“